

Dei Erfolgsgeschicht: 30 Jahr „Bund Niederdeutscher Autoren“

Dei ierst, nah dei Wend in M-V gründ Plattdütschverein, dei „Bund Niederdeutscher Autoren“ e.V. för Mäkelborg-Vörpommern un dei Uckermark (BNA) ward an'n 22.02. 2020 dörtig Jahr olt. Dei BNA-Vörstand hett sick tau dat Jubiläum wat besonnens utklamüstert: All Schriewerslüd, dei as Vereinsmitglieder för dei BNA-Anthologie, „Plattdütsch Blaumen“, Bäuker I (1991) bet XIII (2018), Riemels orer Vertellers schräwen hebben, sall'n in ein Jubiläumsschrift (Bauk XIV), dei in'n Sommer up'n Markt kümmt, noch eins tau Wurt kamen. Dei BNA Anthologie „Plattdütsch Blaumen“ is von't Gründungsjohr an bet hüt dat Paradepierd un Uthängeschild von'n BNA. Dormit dei Bäuker ok in't Og fall'n, hebben dei Taustännigen groten Wiert up ehr Illustrierung leggt, wodörch sei nich blot läsens- sonnern ok ankiekenswiert worden sünd.

2011 würd dei BNA för „Plattdütsch-Blaumen“, Bauk X, mit denn' „Fritz-Reuter-Literatur-Pries“ utteikent! Dat dei BNA in dit Johr up dörtig Jahr grotorrigere Vereinsgeschichte trüggekien kann, liggt an dei flietige Arbeit von sien Mitglieder, oewer ok an dat, wat dei Vörstänn un Vörsitter tauweg bröcht hebben.

Gerhard Diekelmann † (Verchen) hett an'n 22. Februar 1990 mit noch ein poor Schriewerslüd denn' „Bund Niederdeutscher Autoren“ e.V. gründ un wier bet 2000 sien Vörsitter. Up dei ierst BNA-Johresversammlung, in'n September 1990, hebben dei dunnmals 22 Mitglieder in ehr Satzung fastschräwen: „Die zukünftige Arbeit des Bundes muss sein, durch Kurzgeschichten, Gedichte und andere Prosaarbeiten in Niederdeutsch zur Bereicherung und Pflege der niederdeutschen Sprache beizutragen. Geplant ist die Herausgabe einer Anthologie“. All 1991 kem dat ierst Bauk von dei Anthologie unner denn' Namen „Plattdütsch Blaumen“ rut un dei rührige Vörsitter Diekelmann hett nich blot niege un mihr Autoren in't BNA-Boot halt, sonnern ok noch dorför Sorg dragen, dat dei Anthologie-Bäuker II bet V rutkamen künn'n.

Von 2000 bet 2012 wier Wolfgang Mahnke (Rostock) Vörsitter von'n BNA. Dörch orrig 'n poor niege Verbinnungen, bispillswies tau'n Landesheimatverband M-V, tau'n „Niederdeutsch-Beirat“ von't Kultusministerium in Schwerin, tau Schriewerkrinks in'e oll'n Bunneslänner, Journale, Tiedingen usw. hett hei denn' BNA oewer uns' Lannesgrenzen weg bekannt makt. Dei Autoren-Bund harr intwüsch 44 Mitglieder. Mahnkes Verdeinst is't ok, dat dörch Lektoren dei Qualität von Bidräg för dei Anthologie up ein höger Stuft sett warden künn. In sien Amtstiet kemen „Plattdütsch Blaumen“ Bauk VI bet X up'n Markt. Siet 2012 is Wolfgang Mahnke Ehrenvörsitter von'n BNA.

As Mahnkes Nahfolger würd 2012 Dr. Behrend Böckmann (Kirch Rosin) wählt. 2013 läd Dr. Böckmann sien Amt as BNA-Vörsitter dal un künnigte ok sien Mitgliedschaft in'n BNA up.

Von 2014 bet 2018 hett Dr. Jürgen Rogge (Perleberg-Lübzow) as BNA-Vörsitter fungiert. Unner sien Leitung is dat niege Statut verbindlich makt un dei Verbinnungen tau anner Gesellschaften, besonnern tau dei Gillhoff-Gesellschaft,

faster knüppt worden. Mit dei Rutgaw von „Plattdütsch Blaumen“ Bauk XI, XII un XIII, hett Dr. Rogge dei BNA-Tradition wohrt un denn' Plattschriewer-Bund up Kurs holl'n, obschonst dei Mitgliedertahlen dörch dat hoge Öller von dei Autoren trüggahn sünd.

Siet 2018 is Bernd Lubs (Neubrandenburg) Vörsitter von BNA. Hei ward dat mit denn' BNA nich licht hebben, denn blot noch 26 Mitglieder stahn em tau Siet. Sien Gesellenstück ward dat Jubiläumsbauk XIV.

Näben väle anner Aktivitäten hebben BNA-Autoren mihr as Einhunnert Bäuer schräwen! Dorför sünd utteikent worden: Ein Autorin mit dat „Bundesverdeinstkrüz“, nägen Autoren mit denn' „Johannes-Gillhoff“- orer „Fritz-Reuter-Literaturpries“, ein Autor mit denn' „Unkel Bräsig-Pries“ un ein Autor mit denn „Lannessprakpries M-V“! Ok dorüm sünd dei 30 Jahr Bund Niederdeutscher Autoren ein Erfolgsgeschicht. Dei starken, kreativen Schriewerslüd harrn dat BNA-Stüerrad ümmer fast in'e Hand un hebben mit ehr niemodsche Literatur Dorför sorgt, dat Plattdütsch in uns' Land ok taukünftig ein wichtig Kulturgaut bliwt. Dorbi is allein dei Rutgaw von drüddteigen „Plattdütsch Blaumen“-Bänd, mit tausamen 2100 Sieden nedderdütsche Literatur, dörch einen Verein, dei sick blot oewer Mitgliedsbidräg un Sponsoren finanziert, in Nurddütschland einmalig!

Mit Stolt, Freud, oewer ok Weihmäudigkeit kieken wi up dei schöpferische, dörtigjöhrlige Vereinsgeschichte trügg. Männigweck von uns' BNA-Autoren, mit dei wi orrig 'n Wegstück tausamengahn sünd, hebben ehr Schriewtüg all för ümmer bisiet leggt. Sei kamen in't „Jubiläumsbauk“ noch eins tau Wurt, wieldat wi dei Erinnerung an sei wak holl'n will'n. –

Wolfgang Mahnke
Ehrevörsitter BNA